



**Nuummi innuttaasunut immikkut nakorsiartarfeqalerneratigut nakorsiarsinnaaneq oqinnerulersinnaassanersoq pillugu apeqquteqaat aallaavigalugu oqallisissiasatut siunnersuut.**

(Atassutip Inatsisartuni ilaasortaataitai)

**Qanoq iliornikkut nakorsat namminersortut nakorsiartarfiutitaarnissaminnut aallartisarsinnaalernissaat aqutissiuunneqarsinnaanersoq pillugu apeqquteqaat aallaavigalugu oqallisissiasatut siunnersuut.**

(Atassutip Inatsisartuni ilaasortaataitai)

**Peqqinnisaaq pillugu sillimmasersinnaanerup atuutilersinneqarneratigut peqqinnisaaqarfisinnut oqilisaataasinnaanersoq pillugu apeqquteqaat aallaavigalugu oqallisissiasatut siunnersuut.**

(Atassutip Inatsisartuni ilaasortaataitai)

Qujanaq Atassut pingasunut siunnersuutitut. Uani oqaaseqaateqarninni immikkut oqaaseqaateqarfigissallugit toqqarsimavara.

### **Imm 137: Nuummi immikkut nakorsiartarfeqalernissaa**

Demokraatinut pingaaruteqarpallaangilaq, Peqqinnisaaqarfiup qanorpiaq iluasilersorsimanera. Uagutsinnut pingarnerpaammat, innuttaasut qaqugukkulluunniit pitsaanerpaamik peqqinnisakkut sullinneqartuarnissaat. Maannakkorpiaq Peqqinnisaaqarfik tamarmi ilungersunartumiippoq. Ernisarfiit matoortut. Nakorsanik amigaateqartoqarpoq. Peqqissaasunik amigaateqartoqarpoq. Unamminartut amerlangaarmata taasassat amerlagaluaqaat.

Upernaaq Peqqissutsimut ataatsimiititaliarsuup isumaliuutissiissunni utaqqisaaqisoq kiisami saqqummiuppa. Qangatsiנגorpormi, Demokraatinilu pakatsissutigaarput, Naalackersuisut sulii iluamik iliuuseqanngimmata innersuussuterpasuit piviusunngortinnissaasa aallartinnissaannut. Maani inersuarmi aammalu tamanut saqqummiussamik isornartorsioreerparput. Naalackersuisuniit anguniakkanik nalunaarutinillu takunissarput amigaatigaarput. Maannakkut suliat Naalackersuisut tungaanniit ajorluinnarput. Ajornerpaavoq Naalackersuisut iliuuseqannginnerat, Peqqinnisaaqarfiullu iliuuseqannginneranni pitsanngorsarneqarsinnaannginnera misigaarputtaarlu, innuttaasut Peqqinnisaaqarfimmut tatiginninnerat appariartortoq. Tamanna akuersaarneqarsinnaanngilaq.

Nuummi immikkut nakorsiartarfimmik pilersitsisoqassanersoq, isumaqanngilanga, immikkut nakorsiartarfittaarnikkut allannguuteqangaartoqassasoq. Ilimagaara, sulisut amerlassusaat, ajornartorsiutaanerpaasoq. Sulisut amigaataapput. Suliap annertussusaanut tulluuttumik peqqissutsimut ilinniarsimasunik sulisunik naammattunik peqaraluarpat, Nuummi innuttaasut Peqqissaavimmut atassuteqarniartarnerminnut ajornartorsiorunngikkaluarput. Taamaattumik immikkut nakorsiartarfiup Peqqinnisaaqarfiup ajornartorsiutai aaqikkunngilai. Demokraatit kissaatiginerugaluarpaat,



Peqqinnissaqarfimmi sulisussarsiortarneq sulisullu piginnarnissaannut suliniuteqarnerup ukkatarinissaat. Taakkuummatami, ajornartorsiutiginerpaasagut.

#### **Imm 153: Nakorsat namminersortut nakorsiartarfiuteqalernissaat**

Demokraatit tunngaviatigut nakorsat namminersortut nakorsiartarfiuteqarnissaat napparsimaviillu namminersortut isumaqatigaat. Uanili apeqqut soqutiginartoq unaavoq, innuttaasut amerlassusaat naammannersoq, nakorsamit nakorsiartarfimmik aallartitsinissamut imaluunniit nakorsanit aallartitsinissanut imminut akilersinnaasunik. Kissaatigaarput, sukumiisumik misissorneqassasoq, nakorsat namminersortut nakorsiartarfinnik aallartitsinissaannut inatsisitigut naalleraatit suunersut. Kissaatigaarput, naalleraatit taakku tamarmik aaqqinneqassasut. Taakkulu saniatigut kissaatigalutigu, tassunga atasumik tunngaviisamik pilersitsisoqassasoq, aningaasat napparsimasoq malittarissagaat. Tassa imatut paasillugu, pisortat napparsimasumut ataatsimut tapiissuteqartassasoq, nakorsat namminersortut nakorsiatarfianni passunneqartumut, aningaasat annertussuseqarlutik, napparsimasup pisortat ingerlataanni peqqinnissaqarfimmi passunneqarsimassagaluarpat sipaarutigisaatut annertutigisumik.

Uparuassavarali, naatsorsuutigineqassanngimmat, nakorsat namminersortut nakorsiartarfiutaasa Peqqinnissaqarfimmi unamminartorpassuit aaqqissinnaanngimmatigit, soorlu taaneqareersut sulisussarsiorneq sulisullu piginnarnissaat.

#### **Imm 154: Peqqinnissaq pillugu sillimmatit**

Demokraatit inuit namminneq peqqinnissaq pillugu sillimmasertarnerannut isumaqataavoq. Tamanna qularutigineqassanngilaq. Takusinnaavarput, ullumikkut periarfissaareersoq peqqinnissaq pillugu sillimmasernissamut aammalu maani nunatsinni innuttaasut ikigisassaangitsut peqareersut. Tamanna iluarinartipparput, innuttaasumut, inuussutissarsiornermut aammalu inuiaqatigiinnut tamarmut.

Imaappormi, Peqqinnissaqarfimmi suliaritinnissanut aalajangersimasunut utaqqisut amerlangaatsiartut. Taakku kinguneraat, innuttaasoq passuneqarnissamik pisariaqartitsisoq allatut ajornartumik pisariaqanngitsumik suliffimminiit sivisuumik peqanngittariaqartarmat, minnerunngitsumillu innuttaasoq piffissami sivisuumi anniartitaasarluni, nalornisinneqarluni assigisaanilluunniit. Nammineerlunili peqqinnissaq pillugu sillimmateqaraanni passutsinnernut aalajangersimasunut nunani allani namminersortuni nakorsiartarfinniinneq matussuserneqarsinnaalluni.

Tamanna napparsimasumut sukkanerusumik passunneqarnissamik kinguneqartitsissaaq. Inuussutissarsiornermut kinguneqassaaq, sulisup iluatigisap piaarnerusumik suliffimminut uteqqinnera. Inuiaqatigiinnullu kinguneqassalluni, passunneqarnermut aalajangersimasumut utaqqinissap sivikillinera, aammattaarlu napparsimasut allat utaqqinerannut sivikillisaataalluni.

Nammineerluni peqqinnissaq pillugu sillimmasernissamut pitsaaqutit amerlasuujusut takusinnaavagut, neriullutalu, kattuffiit maani nunatsinni isumaqatiginninnialerunik tamanna ukkatariumaaraat. Sulisitsisumit akilernerqartumik peqqinnissaq pillugu sillimmateqarneq uagut isitsinni imminut akilersinnaavoq suliffeqarfimmut sulisumullu.



Tassalu Demokraatit Atassutip siunnersuutaanut pingasunut isummersuutaat. Oqalliseqqinnissaq qilanaaraarput.